



„Drywa“ izit kotru nedel.

Gods-moksa 2 rb. 50 k., pusgods
1 rbl. 40 kap.

SLUDYNOJUMU MOKSA:

Par winas petita-ripes (eilinias)
witu: pirmâ lopas pusē—20 k.,
caturtâ—10 kap.

Adresu pormainišona moksoj 20 kap.

Piktajs goda gojums.

Redakcijas, Administrācijas un Ekspedīcijas adrese: С.-Петербургъ, 1 рота, 11.

Redakcija laipni lyudz wysus
rukrokstus un naudu syutit uz
pašu redaktoru pa adresei:

Гатчина, Костель, Кс.
К. Скринда.

Rukrokstus un zinias Redakcija
atpakaļ' izsyuta tik uz kotra
iprikšēja lyuguma. Bez paroksta
un adreses roksti nateik pijemti.

Ar redaktoru war porrunot pa
telefonu Gatčina Nr. 223.

„Aglyunes Zwaigzne“.

Kooperacija.

Nu 11 leidz 16 martam, uz Piterburgu teik aicynoti wysas Kriwijas seiko kredita un lauksaimniku kooperācijas priekštowi. Šitys byus liuti swarigs gadejums Kriwijas kooperācijas dzeiwē. Padeju diweju godu laikā Kriwijā tyka izduts wairok nakai 4000 atliowu uz kooperaciju atklošonu, — nadzērdati skaitli kooperācijas westurē. Taisniba, na wysas šos atliautos bidribas tyka iwastas dzeiwē, bet kgs Merkulows piskaita Kriwijā ap 22,000 strodojošu kooperaciju. Tikai wina seiko kredita kooperaciju apgruzejumi snadzas leidz 300 miljonu rubliu. — Zynoms, saleidzinojut ar Kriwijas plašumu un apdzejwotojim, ši skaitli pawysam mozi. Dreiza augšona kooperācijas

jau gondreiz dora namiru, tai kai daudz kur naw taidu cylvaku . . . wyswairok lauksaimniku kooperācijas, kuri spej jos labi west.

Inteligences pi mums uz solom wyspori ir moz. Bet leloko nalaime ir tej, ka lauksaimniku kooperacijās inteligences napilaiž, — uz winiu skotos liuti nauztycami. Biži win gadejos skaitit cyrkuliarus, kurūs pogosta skreiweri skolotoji un goridzniki beja gais atsasacit nu wadibas seiko kredita kooperaciju.

Loboki un wyswairok izgleitoti spaki teik atstumti nu kooperācijas darišonom. Palykuši, pi wysas winiu labwelibas, na wysod apdowynoti ar wadzizgom zynošonom. Topec tyukstušu kooperācijas priekštowu sabraukšona, winiu debates un nulyuks igyun pirmu interesi.

Padejā laikā trejs spaki strodoj del izplatišonas Kriwijā kooperācijas. Waldiba wysleloku weribu ir grizuse uz sieko kredita bidribom, paleidz jom apgruzejumūs, skotos pec ju operacijom un padejā laikā pagriž winiu weribu uz maizes tergošonu.

Pa šitu celiu it ari zamste, iwarodama aprinkiu un guberniu seiko kredita kašas. Uz gola trešajs spaks, priwata iniciatiwa, kai jau i wareja gaidit, stota sew plašokus nulyukus un izwad gaismā wysaidas nusadorbošonos. Priwatas bidribas wad kooperācijas ideju, propogandu, dzemdej literaturu (Piterburgā, par pim., ir izgojis „Westnik Kooperacij“). Moskowā nudybynots „Sojuz potrebitelnych obščestw“, kurs apjem 549 bidribas un apgruza wairok par 3 milionim rubliu.

Priekštowu darbībā ikkotram nu šim trejim spakim ir sowas

gaišas un tymas puses. Sabraukšonā wysi šiti priekštowi sasatiks un pordus wins utram sowas dumas. Winim stow priškā izsacit pec swarigim jautojumim nokušu kooperācijas lykumu izdušonā un takužas kooperācijas darišonas. Bet golwonajs sabraukšonas aizdawums ir satywynošona un apgaismošona liaužu, strodojušu šitu dorbu. Golwonajs Kriwijas kooperācijas pi-prasejums — pigatawošona izgleitotu un atsadawušu darišonai cylvaku.

Pec „Sowremennoje Slowo“
Nr. 1491.

Zinias nu Dzimtenes.

Ondrupines kredit-sabidribas kasa 1911 godā ir tai strodojuse: pori par 44 tyukstušu apgruzejuma. 1 janwarī 1912 g. kasā beja 1743 rub. 48 kap. Gods inokuma nu 1700 leidz 1800 rub. Seneju inokumu leidz 1600 rub. Bidribas lucekliu wysu skaits beja pori par 500; nu tim leloka dalia bidru ir inasuse paju pylnu, t. i. 10 r. Topec paju naudas byus ari pori par 5000 rub. Bidriba jau ir iperkuse sowu ipašu nu guns apdrušinojušu skapi.

Ondrupinē 15 februarī kaidi liaundari, uzbrukuši D. Gr. uz kokla, ku tik nanunowejuši to kruga durowōs. D. Gr. sprucis waliā un nugojis uz sowu broli, kurs turpat Ondrupines mistiniā dzeiwōj, bet pi brolia atradis durowas aiztaisitas citi un grizis atpakaļ. Redzis, ka ir bejis apreibis nu brandwinia un nu sitinia, jo, idams uz krugu, pagojis garum un nugojis pret žaida budes durowom,

kūr uz jo utru reizi uzbrucis wins liaundaris un pec cyti diweji wel sytuši pec to, kai tys gulejis pakritis. Welioķ tu atradis brolis pusdzeiwi. Pec pusstras dinas sasystajs, nadagojis pi samianas, numyra. Aizdumas kreituz uz kaidim wacticibnikim, bet pirodejumu tryukst. Tai Ondrupinišūs par nagrau laika gojumu diwi jauni puiši atroda sew nowi nu sitinim. Jopimin un tu, ka te teik dzeržams par dažim specialitsim kaušonos litā.

— 9 februari Ondrupines pogostā beja seik-kredit bidribas (kasas) sapulce. Stosp cytom darišonom wins nu goridznikim (goridzniki te beja četri) lyka priškā sapulcei, lai, pec pimara dažu cytu bidribu, ari Ondrupines bidriba asignetu 50 rubliu nu teiro inokuma naudas del Rezeknes Terdznicibas wai del Greiškanu Zemkupibas školom. Kaidu breidi liauds ni tai, ni tai naatsasauce. Bet pec nagara laika soka runot: „myusu barni uz taidom skolom nastaigos“. Kuri staigojut, ti lai i moksojut. Par weli ti pa cik kortu porrunoja, ka tos školas ir del wysim un napičšami wadjadzigas un aicynoja uperet kaut 25 rublius, bet un tu nuklidze, ka n awajag. Tai tad ondrupiniši atzeist sewi par pecnocejim sowu wacu tawu un gaismas wel namilioj. Tumar te jopimin, ka waci tawi nabeja taidi dzaroji, kaidu tagad atsarun daudz, nabeja seniok un kaušliu. Tagad krugs ar priwilegijom, jo uz mistinia pamatu lykumim, izmoceja dzert, kautis.

Burlakūs išona ondrupinišūs nasamozynoju, bet tymā witā mozok interesejas par zemi un zemkupibas kursim. Ceresim, ka ondrupiniši uz prišku soks saprust wairok.

Nu Kolupa. Kolupa zemkupibas bidribai ir atsyutiti diwi krunia erzeli, ardeni sugas, kura wysporigi ir pazeistama, kai weseliga, stypra dorba, izturiga un apsamirnojuša ar woju baribu. Kas walatus izlobot sowus zyrgus, lai pasasteidz izlitolitu gadejini. Kuru saiminiku kewem ir mozi kumeli nu parnejim erzelim, ti nu sowu mozu zirdzinu ir liuti apmirinoti un soka, ka itaidu kumeliu wel nabejuši redzejuši: pazamom kojiniom, rasnu koklu un kryuts plotas kai kukul's. — Kurim byus kumeli nu parnejim erzelim, ti ir lyugti atdzeit uz Kolupa bidribu kewi ar tu kumeliu un pajemt leidza licibu (swidetelstwu), kura beja izduta, lai waratu iwest gromotōs jaunus kumelius, ar tu nu-

lyuku, ka kad par godi 4—5 bidriba sareikos izstodi, lai tu kumeliu saiminiki waratu dabot kaidu gudolgu (zynoms, tikai par tim kumelim byus duta gudolga (nagrada), kuri byus lobi un labi izaudzati); un itu wajaga padarit leidz 14 junijam. Uz krunia izstodem zyrgi bez metrikom nateik gudolgoti.

Waraklioni. 105 „Drywas“ n. beja rakstits, ka šenes kasas (banka) apgruzejums 1911 godā iznas ap 70 tyukstušu rubliu. Bet patisibā tej kasa ir apgruzejuse mynatā godā ap 84 tyukstuši. Teiras pelnias ir palicis pori par 3 tyukstušim rubliu. Bidru ir pori par 1 tyukstušu.

Wysā Latgolā (Rezeknes, Ludzas, Dynaborgas aprinkūs) skaita ap 60 kasu (banku). Jo ikkotra kasa caurmarā pelnej 1½ (pusutra) tyukstuša godā, tad wysa Latgola kupā daboj 90 tyukstušu rubliu. Lela nauda! — Agrok wysa jej tyka žaidu un taidu-šaidu ruka. Krojut pa 90 tyukst. godā myusu mola (Latgola) par naz-cik godim tures miljonus, kuri tops litojami taj pat molai par lobu — wai celiut mojas, wai pazeimojut naudas sumas priķš labdaribas merkim (školom, gromotu izdūšonai, awizem . . .).

— Barnim, kuri (katoli) staigoj uz kriwu draudzes školu (cerkowno-prichodskoje učilišče), witejajs batiuška-misionars ir padalejis lapinias ar dalyktu zigeli (pečati): izdaniye Witebskago misionerskago komiteta (Witebskas misionaru komitejas izdawums), kur ir brismigi mali par katoliu ticibu un ju baznickungim Dažas eilinas tai ir oplomas, ka mynut par jom pat saaugušim cylwakim byudi palik sorkoni — nawys mozim barnim. Witejajs batiuška warbyut cytaiž namok byut par misionaru, tikai ar lapiniu paleigu plasdams slawi sowim tuwakim (katoliu baznick.) un smodedams katoliu ticibu. Sowaida misija! . .

— Wysas ols - pordutowas (piwnos) ar patentim, 16 gobolu, ir uz katoliu worda; žaidi tikai par ols pordewejim — prikazčikim. Jo nuteik kaida nalai me olsbudē — tad joatbild, saprutams, tos saiminikam, uz ko worda jej ir aizrakstita — myusu cilweciniam, žaidu labdaram-latwišam. Prikazčiki (žaidi) dud sowim saiminikim ols, cikwin ti grib, drusku wel imoksoj — i ko tad wel wajag? — war jau slept žaidu nadorbus un nuzigumus. Ka storp myusu olsbužu saiminikim atsarostu gudroki weiri — jemtū un izdzeitu

nu sowu bužu žaidus — prikazčikus, tys gon byutu brangi. Tulaik itu litas klajā un byutu radzams, kam war turet ols-pordutowas un kam nawar, — kas dreikst byut par prikazčiku un kas na. Bet wai tad war ceret, ka myusu saiminiku storpā patiši atsarass taidi gudriniki?! Dreizok nutiks kas cyts, tikai na šitys. Nasen, pimaram, Meža Strodu „starosta“, katolis-latwits, izdewe licibu, ka nu mojas, kurā žaidis grib itaisit ols-pordutowu, leidz baznicai ir wairok, kai 15 (picpadsmit) osu, bet patisigs mars roda, ka ir tikai 9—10 osu. Un tagad, koleidz byus tisa, pi pašom baznicas durowom dzeršona, klaigošona un tai toliok.

— Zam Zimas Swatku mes pogosta sapulces wordā isnedzem wersibai lyugumu, ka tej dutu pyrmocibas školōs taidus skolotojus, kas mok latwyski. Leidz šam wel naturim atbildes.

— Uz lynim cena pasacele. Par berkowu moksoj 55—60 un pat 70 rubliu.

— Dažim sina pordewejim nacik sen' dewe pa 5 rub 50 kap. par berkowu, bet ji napordewe, ceredami, ka wel nadreži byus pawasars, — un topec wares jemt par sina berkowu 8 un 9 rub.

W. L.

Zosna (Kapleica Dyūžgolas draudzē). „Drywas“ 111 numerī jau beja rakstits, ka Zosnas zemniki nagrib magazejōs bert maizes, — taipat nagrib naudas moksot. Lai-gon zemskajs spiž, bet zemniki ir nudumojuši turetis, cikom wares. Par itu turešonus nasen beja sasaukta kantorē sapulcē un wysi zemniki, kuri beja 24 janwari uz sapulces tyka nustropeti pa 3 rub. sewkurs cylwaks. Wysu beja ap 175 cylwaki. Bet wajag te minet, ka agrok šitos sapulces beja izsyutitas wysim „pawestkas“ ar pasludynošonu, ka kas naatitu 24 janw. uz kantori, tys byus stropets (naudu moksot wai atsedet soltajā). Zynoms, wysi nawareja atit, un stropeti nabeja, bet ti 175 cylwaki, kuri uz kantori atgoja, palyka nustropeti pa 3 rub. sewkurs cylwaks par pretošonus. Tagad sew zemniki protoj: nait uz kantori — tyulen stropej, otkon it — tad wel stropej. Bet šitu reizi, kuri nagoja, palyka nanustropeti un zemniki storp sewim runoj, ka tagad lobok nait uz kantori, laigon i byutu „pawestkas“. Šitos stropes zemniki nagrib pijemt, un moksot, todel ji izlaseja diwi wai trejs cylwakus, kuri brauks

uz Witebskas gubernatoru maklatu taisnības. Bet zemniki nagrib braukt tukšom rukom. Ji grib dabot nu pristawa kopiju „doznanijas“, nu kuras byus radzams, kas apmaloja pret Rezeknes isprawniku, ka zemniki uz sapulces Rozentowas kantorī 24 janwarī gribejuši izlaust un izlauzuši kasu un izdauzejuši lugus. — Ti šito wysa nabeja, wysa sapulce porgoja mirigi. Todel zemniki, dabojuši itu kopiju „doznanijas“, braukšut ar ju uz gubernatoru un pečov taidu apmalotoju gribut padut pi tisas. Uz gubernatoru zemniki dumoj braukt dreizā laikā. Zosnonišu liaudīs war redzet ciši lelu winibu un nawar atrast ni wina, kas gribatu palikt mirā ar šu nalamī del jim. Celiaweirs.

— Pi Zosnas kapleicas natol' ir magazejas klets Zosnas „obščestwas“ (zynoms, maizes nāv). Laigon itymā „obščestwā“ ira kriwu, bet ji wysi ir mirā wysu naudu, kuru sajems nu pordušonas klets, atdut uz Zosnas kapleicas wajadzibom. Todel zemniki grib kantorī pataisit „prigoworu“ pordut kleti un izrucetu naudu uperet Zosnas kapleicai. Dyuzgola baznickungs beja saaicynojs zosnonišus parunot un nusprist par uzlikšonu jauno jumta uz kapleicas. Bet, izzderdis nu liaudim par ju taidu nudumu, darišonu atlyka toliok, protodams: jo wares naudu nu pordušonas klets pagrizt uz kapleicu, tad lobok byutu sataisit jaunu kapleicu, jo šitej jau waca, zama un moza. Pagaidisim un redzesim. Lai Diws tim bedigajim zemnicinim dud sowu paleigu!

Celiaweirs.

Nu Beržim. Ruzeniku cimā at-sarun 20 saiminiku. Nu tim 11 ir igotniu, kuri, atidami, cyts nu Waraklionim, cyts nu Dricanim, cyts wel nu kuras molas, atwede ar sewim sowas mudes. Wins dajyucis zemi nu utra kai nabejis attisot, utrs wel kaidā cytā „omotā“ specialists. Par tu šitamā solā (cimā) winumar namiri. Winumar tisojas, winumar plešas storp sewim.

Daudzeji nu jim jau wairok, na 10 godu, kai sokuši ir tisisot un wel Diws zyn', kod gols byus?!

Kaimini, laiks jau byutu jums likt mira storp sewim plestis un porstot skandynot myusu klotdzejwotoju golwas ar sowom bormem.

Kaimins.

Aglyuno. Kai jau zynoms wysim apleicejim dzejwotojim, Pikšini, nu Botoru cima, ir wysuleloki dzaroji un kaušli.

Pors godu tam atpakaļ beja

„Drywā“ rakstits par Donotu Pikšini. Tagad war pasacit naz'cik wordu par jo. broli Joni, kurs aizgawenia dinā reizē ar augšok mynātu jo broli aizgoja uz Sommer-seta trakteri „aizagawetu“. Pilejuši brangi sew aiz „apkakles“, laides uz mojom. Bet celiā sadumoja obi broli kautis. Donots pašu laiku gribeja brangi win imest Joniam, bet padejajs laides begt. Iskrejjs muižas obeliu dorzā, jis pakrita un leidz reitam sasola, nasawerut uz tu, ka, pa liaužu runom, brandwins „ciši sylda cylwaku“.

Utrajā dinā atroda ju steiwu un apputynotu ar snigu.

Pec solunia palyka siwa-atraite un mozi barni.

War pasacit, ka myusu aglyuniši ciši milioj Palnu dinā „zubus skolot“. Cytu reizi kai soc skolot, tai i gola naw. Daskaloj da tam, ka napalik dažom ustobom ni wina luga nasabarsta. Aglyunits.

Dwinskā. Kriwu nacionalisti wordūs un dorbūs. Caur šejines nacionalistu pyulem pilsatas dumā tyka ikustynots jautojums gudynot nalaikia P. Stolypina piminiu caur pisadališonu pi pimineklia celšonas Kijewā.

Pa prišku lyka uz bolšošonu prikslykumu dut del augšok mynato merkia 150 rub., tad 125 rub. un beidzut 100 rub. Bet bolsojut ti wysi ar leloku bolsu wairokumu topa atraiditi. Bet pats roksturi-gokajs nutyka pec sedes beigom, kad pilsatas golwa uzaicynoja nacionalistus caur parokstim storp pilsatas dumnikim salasit dowynojumam wajadzigu sumu. Bet korsti nacionalisti beja pyrmi, kas nu šo prikslykuma atsasaceja, lai winim caur tu nadaitu ar dorbim pirodit tu, ku te ar wordim beja prasejuši. Pec „Rig. A w.“.

Pa Kriwiju un jos numalem.

Warsawā. Prokurors, kurs apwainioja pret tisu Domaziju Macochu un jo „leidzstrodnikus“, nasasut apmirinots ar uzlyktu uz jim stropi. Jis asut padewis protestu, kurā lyudzut wysim palelynot stropi. („R. S.“).

Kijewas gub. pilsatā Ross sasastreideja baznickungs Gaikowičs ar bejušu pogosta wacoku.

Pogosta wacokajs pasauce bk. Gaikowiču par „Macochu“. Baznic-

kungs maneja sewi par apkaitynotu un wylka pogosta wacoku pi tisas. Padejajs tyka nutisots uz 15 dinom aresta.

Taganrogā. 1 martā šachtā „Ital-janka“ nutyka gazes sprodzins. Ar sprodzini nusysti 59 cylwaki, 10 — stypri iwainioti.

Nowočerkaskā (Kriwijas dinawydūs). Sabruka kolnroktuwe un pagloboja zam sewis 10 moceklius.

Baku (Kaukazē). Atrosta wyltotu marku fabrika. Diweji „fabrikanti“ aresteti.

Krasnojarskā (Sibirē). Kanskas aprinkī aresteti diwi „ubogi“. Obi wel pawysam jauni cylwaki. Wins nu jim „okls“, utrs — „kroplis“. Aresteti pisazyna, ka padejūs laikūs asut izdarejuši kaidu 15 slapkawibu un laupišonu. („R. S.“).

Odesā. Natoli nu Odesas okā atrosts siwites skelets. Tej siwite, kai izaskaidroja, beja nusysta wel 1906 godā. Ju nusyta un iswide okā kaidš slapkowa. Mazans, beidamis, ka tej, zynodama, ka jis tymā pat godā nukowa wysu saimi Štamglo, naizdutu jo policijai.

Archangelskas gub. Trufanowas cimā (Šenkuras aprinkī) zemniks Ign. Kiselews, byudams napylnā protā, nusyta sowu siwu, tad nucta jaj ar cerwi golwu. Pec tam nukowa wysus sowus septinius barnus.

Astrachanē (Kriwijas dinawydūs). Nu šenes it zinias, ka pilsatas apkaimē numyruši 2 cylwaki, uz kurim kritušas aizdumas, ka ji asut slymi ar džumu. Saslyma ar džumu wel wins cylwaks.

Tobolskā (Sibirē). Išimas aprinkī atrosti wel 34 sasoluši cylwaki nu pazudušu skaitlia wejputniu laikā, 19 janwarī.

Astrachanē. Te wins zwejniks sagywa lyuti lelu ziwi. Tej ziws swere 40 pudu. Zwejniks par šitu ziwi daboja 2 tyukstušus rubliu.

Woronežā dzejwoj wins wecels Panows, kuram jau 122 godi. Wecels wel disgon dušigs un spej cerst molku.

Zinias nu orzemes.

Kinijā -- respublikā. 26 februari Juanšikajs istoja republikas prezidenta omota izpildišonā. Juanšikajs pret wysim liaudim swinigi pizwereja byut uzticigam konstitu-

cijai un pyuletis par walst un pawalstniku labklojibu. Šajā swinīgā dinā tyka nucalta strope nu wysim wylktim pi tisas wai jau nutisotim, izjemut tik slapkawas un laupitojus. Tyka atmeiti ari zemes nudukli, kuri guleja uz liaužu kokla.

Respublikas pretiniks provinces Sen-Si gubernators Šen-Juns natoli nu pilsatas Tunguania uzwareja izsyutitus pret ju republikas karapulkus. Jis pat draud stumt sowus karapulkus uz Pekinu. Jo karaweiru skaitlis ju dina, ju wairojas. Juansikajs asut grizis ar lyugumu pi bejušos Kinijas kenenites, lai jej porsorgojut Sen-Junu nu taida sulia un lai aizrodut jam, ka ar sowa itilumu jis niko napanokšut.

Dumpis storp dažim republikas karapulkim wel pastow. Nasen celes dumpis storp karapulkim, kuri slow pilsatu Učžou un Silina apkaimēs. Dumpiniki laupej witejus izdeiwojotus.

Kars storp Turcijū un Italiju. Itališu awize „Tribuna“, runodama par picu golwonoku walstiu wydušonu (posredničestwo) turku-itališu kara pabeigšonas litā, storp cytu izsoka nokušu. „Turcijai josaprut, ka provinces Tripoli un Kirenaiku jej ir pazaudejuse uz wysim laikim. Jo Turcija nagrib byut ar tu mirā un grib turpynot karu, tad Italiija liks wysas pyules, ka galigi izputynot sowa pretiniku. Todel walstem-wyduotojom tys joaizroda Turcijai un jowad ju pi sapsrāšonas“. Romas Taws asut grizis pi wysom walstem ar notu, kurā, kai Kristus Witiniks, izsoka welešonus, ka jos lyktu wairok pyuliu pi dreizokas kara pabeigšonas.

29 februari nu itališu numetniu celes naz'cik gaisa skrinamu kugiu un nuskreja uz tu pusi, kur beja apsamatuši turku karapulki. Nu gaisa kugiu, kuri skreja 100 metru augstumā, tyka swistas 28 bombas, kuras izdareja lelu trucksni storp turkim un aizdewe jim lelus zaudėjumus. Turki raudzeja apšaudit gaisa kugius, bet ju ludes nawareja sasnegt taida augstuma. Tymā pat dinā (29 febr.) natoli nu pilsatas Bengazi nutyka diwi sadursmes storp turku un itališu karapulkim. Pec ilga kautinia turki beja uzwarati un spruka begt. Itališi dzynos turkim pakal' un syta jus. Pi turkim nusysts wairs na 1000 cylwaku Iwainiotu skaitlis wel leloks.

Kolnraceju streiks Anglijā. Sa-

runas storp strodnikom un kolnroktuwiu saiminikim wel leidz šam naw niko panokušas. Pusotra miljona kolnraceju sed bez dorba. Ikkotru dinu nu wysom Anglijas molom it jaunās zinias par fabriku un zawodu aiztaisisonu aiz ugliu tryukuma. Laigon wel i waratu dabot ugliu, bet jos tik milzigi dorgas, ka ir daudzi izdewigok pawysam aizslegt fabrikas un zawodus, nakai moksot taidas milzigas cenas. Pa dzelža celim kotru dinu staigoj wys mozok un mozok wilcinu. 120 tyukstušu dzelzceliu strodniku palik bez dorba.

Pilsatā Šeffildā gages apgaismošonas kompanija ir grizusis pi magazinu saiminikim ar lyugumu pamozynot lukturu skaitli magazinu lugūs un uz durowom. Uz šos pilsatas ilom nu ikkotru diweju lukturu dag tik pa winam.

Kolnraceju streiks Wocijā. Wocijā tagad streikoj drusku wairok par pusi wysu kolnroktuwiu strodniku. Te storp strodnikom naw taidas winprotibas, kaida ir monoma Anglijā. Dažos kolnroktuwēs dorbs pawysam nabeja portraukts, dažos streikoj tik puse strodniku. Utrō puse napikreit streikam un it uz dorba. Tymōs kolnroktuwēs, kurōs dalia strodniku it uz dorba, stow policijas pulki, lai aizstowet strodnikus nu streikotoju uzbrukšonas. Daudzejōs witōs nuteik sadursmes storp streikotojim un streika napikritejim. Taida sadursme nutyka, pimaram, pilsatā Brukgauzenā. Streikotoji gribeja sasist tus nu sowim bidrimstrodnikom, kuri goja uz dorba. Policija aizstoweja streika napikritejus.

Taids winprotibas tryukums pi Wocijas strodnikom ir izskaidrojams wairok caur tu, ka šenes strodniki natur tik daudzi naudas, kai Anglijas strodniki. Caur tim imeslim ji i nawar wysi steikot un palikt ilgoku laiku bez dorba.

Streiks Francijā. Te pasludynoja streiku kaidu 10 kolnroktuwiu strodniki. Bet utrā dinā ji wysi otkon stojos pi dorba.

Kronika.

= „Wilnas Kurjers“ ir paziņojis, ka storp Romas Tawu un Kriwiju palykuse osoka satiksme.

= Tej pat awize wel drusku agrok beja pasludnojuse, ka Romas

Taws grizis uz Kriwijas Keizaru, aizstowadams Waršawas weiskupu Rušnewiču, kurs, kai jau zynoms, nutisots uz cituksni uz gods un četru menešu ilgu laiku.

= Gondreiz wysas awizes pasludynoja, ka Piterburgas katolilatwiši isnaguši Romas Tawam lyugumu caur Mogilewas Arciweiskupu, kurā apsyudzets myusu Arciweiskups, ka naiwaroj latwišu (katoliu) gorigu wajadzibu. Taipat ir awizēs ziniots, ka šimā pat litā nu kaidas latwišu grupas asut paduts Romas Tawam cyts lyugums taišni jo rukōs.

= „Rudzu worpas“ dinā, kad laseja naudū del tim, kas Kriwu walsti ciš bodu, Piterburgā un tos ap'ortnē tyka salasits pori par 180 tyukstušu rubliu.

Kai es sagaideju lobus auglius, batwinius audzedams.

Es, kai zemnika dals, jau sen meginaju, kai izaudzet lobus batwinius (burakus) del lupu, bet man te joatzeist, ka wys naz'kai lobi nizauga: wai izkolta, wai auga, bet mozi. Bet pedigi tyku apmirinots nu pagojuša 1911 goda batwiniu ražojumu. Topec gribu pastosit „Drywas“ lasitojim tu wysu, ku pidzeiwoju ar batwinim. Gododams gabaliniu zemes apstrodot del batwinim, pawasar, kad jau beja zeme porkoltuse, izwežu zyrgu maslus, kuri par zimu beja skaudzē porstowejuši un labi win pordaguši. Izwastus maslus tyulen apora, pec nedelias nueceja. Tad dewu zemei miru un gaideju kod rasads sadeigs; te batwini paaugs, cikom byus josej. Nu rasada batwini beja stodynoti wogōs tyulen pec boltu kopustu rasada stodišonas,—ap pusi maja. Pi batwiniu wogōs sadynošonas tyka ti apliti ar yudini, kuram beja pilikti „superfosfata“ palni (uz kotra spania wina sauwe palnu). Laiks beja sauss, topec baimes mani jeme, werutis, ka batwinim apkrita lapinias. Ari gryuši laide jaunos sersninas nu zemes. Tumar dažas reizes jus nulaisteju ar teiru yudini. Pec treju ar pusi nedeliu batwini izlaide utru pori lopu, un tad tus apborsteju ar čilijas salpetera soli, tai ka uz kotra batwinia iznoktu ap winam perstinikam gabalinš solia (kai mozo persta galinš). Dreizi pec to beja izwogoti, pec rawati, wel reizi wogoti un rawati

(kai tik apauga ar zoli). Jau apus wosoras pateikami beja wertis, kai batwini spingedami auga, laigon wita beja sausa. Lokstus lupim laužeja, zam rudinia ari paši soka lyust, (jo beja leli). Rudini batwinius nujemu. Gribadams zynot, kaidis ražojums, lyku atswert; tad izgoja trejs symti pudu nu winas sastas dalias desetinas (pus pyurawitas). Jo byutu bejuse wysa desetina, tad byutu bejis tyukstušs ostoni symti pudu. Nu to gabalinia lokstu tyka kaidi pici kubuli, „sakupotu lokstu“. Tad taupejums gondreiž wysai zimai. Ja, mozs beja utrs taidis gobols cytā witā. Tad gutiniom, dreikstu dumot, šugod batwiniu warešu welet est par wysu zimu pa 10 marciniu dinā sewkurai (nu sešom guwem). Tai tad, batwinius sadynojut apzinigi, war redzet lelu lobumu. Bet batwinius wajag set rasadā un labi zemi pigatawot. Batwini, ar kurim man beja meginojumi, ir ekkendorfa sugas.

Zemnika dals.

Ar ku un kai dabarot lupus pawasarā.

Tikku paspej pawasar zolite izleist nu zemes, kai jau myusu saiminiki laiž lupus uz pliowas. Zynoms, lupinš ticis waliā nu klawa, kur beja jostow wysu zimu, ar lelu olkonumu kreit pi jaunus zolites, rausta cik waradams un wel wysuwairok meida ju, sadzan wysu zaliuminiu wel slapniā zemē. Myusu saiminiki pricojas nu šito, ka ju lupi paši meklej baribas, bet kas nu to, ka taida barošonos naw loba ni del lupu, ni del pliowas. Pimaram, guws wai zyrgs wysleidzi nu tos ganibas nabyus seits, bet pliowa nu šito ciši maitojas, ar kotru godu piaug nalobas zoles, kuras ni wins lups pawysam nagrib est, — ar kotru godu piaug wairok syunu, kura, kai zynoms, naatnas nikaida lobuma zemnikam. Daturet pawasar klawā lupus ilgok war ar tai saucamu „kūciniu-sinu“, moz zynomu myusu saiminikim. Jauni kryumini — iwiniyas, elkšnia, barza — pawasar teik nugrizti un izworeti. Izworej un tad kupā ar daliu myltu dud lupim. Wai otkon pi setiniom nupliaun jaunu zoliti, niotru un kupā ar cytom rupom baribom baroj lupus. Zynoms, taida bariba naw loboka par pawasara teiru

zoliti, apadamu nu pašim lupim, bet wys ir lobok tai pabarot lupus, nakai ar agru ganisonu pustet pliowu.

Pec kal. J. Sytina P—nis.

Kai es perku separatoru.

(Beigas).

Satā siwa pabore, ka es tik ilgi nukaweju. Soku, ka baznickungs aiztureja.

— Baznickunga del tu gotows i moju aizmerst,—atbild jej. — Tys baznickungs wysim protus jauc. Wai ari tew naraudzeja stostit kaidas mulkibas?

— Na,— atsoku es, nagribadams pisazeit. — Runojom par šu tu.

— Diws zyn, kod ju izcels? Maisos pawysam na sowōs darišonōs. Te i bidribas grib atsegt, i pirunoj liaudim perkt wysaidus nikus. To win i gaidam, kod atsyutis cytu. „Prašenia“ jau sen nususytita.

Ar tu ari beidzes munas sarunas ar siwu. Par garoku laiku raudzeju minet jai par separatora perkšonu.

— Ku, nag tu troks palyki,— atsaceja siwa. — Taidu naudu izdut nika del. Te kungim lobs kaweklis, bet zemnikam naw ku i dumot par ju.

Es apklusu un wairs nadreiksteju sokt runot par šu litu.

Bet separators aizwinam man beja protā. „Lai ti ku liauds runoj par baznickungu, bet jis ir gudrs cylwaks. Zemnikim welej loba un daudz pyulejas del jim. Jis narunos oplom.

Bet siwa, kai ar ju?—dumoju es sewi. Tagad man tai kai kauns ar baznickungu tiktis — reiz jis sauce uz sewim, es nanugoju.

Te pagoja zinias, ka diwi muni kaimini, kuri beja daudz nabadzigi par mani, nuperkuši separatorus. Mani apjeme kauns. Es, kuru wysi skaita par gudroku, palikšu pakal' cytim! Tai nawar byut! Kas ti nabeja, bet separatoru perkšu.

Man par laimi, tys gods beja lobs, augligns. Mes pordewem winu teliu, wacoku zyrgu, jo witā bejom izaudzejuši jaunu. Lynu wel tyka ap pusutra berkowa. Tai tad naudas natryuka.

Winu reiz es laižus uz pilsatu ar stypru nudumu perkt separatoru. Tik siwai nasaceju par tu ni worda.

Tumar pret sklada durowom ilgu laiku šaubejus, wai it wai na. Golā igoju. Wai nuperkšu wai na, bet pasaweršu, par tu naudas moksot nawajag. Separatori tai i kairynoja munas acis — ju tur beja daudz. Es nazynoju, kuru izlasit. Kotrs beja lobs. Pordewejs soce stostit par winu, utru. Wysi lobi un kotrs loboks par wysim. Tys labi krejoj, tys dreizi, ar tu war strodot symtim godu. Pordewejs brangi jus teice—saprota, pogons, kai tu darit. Man taišni golwa apjuka. Saprotu, ka nanucisšu, ka byus joperk. Golā izlaseju tu, kurs man izarodeja par loboku. Numoksoju naudu. „Sklada“ pordewei izarodeja liuti laipni. Ji iznese un ilyka rotūs separatoru. Nu žeidim to nasagaidisi.

Tad laižus uz satu. Bet ju tywok uz satu, ju wairok pitureju zyrgu. Tys paušas ku dreizok tikt mojōs. „Naskrin, zirdzin', ispesi sulim“. Sirds palyka wysā nami-riga. Ku teiks siwa? Kai na leni, tumar tyku mojōs, klusiniom — lai nasateik. Separatoru, ka jo uz reizi naradzatu, nugloboju dzili pyunē. Pats igoju ustobā. Siwa pazyna, ka te naz'kas nūticis, un soce waicot. Es soku: niko nanutyka — wys kortibā. Nagrib ticet. Apsamatu par pikusušu un leinu gultā. Bet kas par skandalu beja nokušu reit, tu gryuts idumot.

— Kur nauda? — waicoj siwa.

— Kaida nauda? — atsoku es.

— A tej, kuru wakar pajemi par lynim.

— Nasadusmoj, siwin', es par ju nuperku separatoru.

— „Separatu!“ — aizbliowe siwa bolsā — „separatu“ ak tu! . . A man ni worda nasaceja — es tew! . . Naudu par walti pustet . . . Soki, kur lyki „separatu“.

— Pyunē, siwin', sinā nugloboju. Tur atrassi.

— Lyga ju ti mekles, rodi pats, kur igryudi.

Gribi nagribi, bet joit. Izwalkam separatoru. Siwa soc ju gryustit nu molas uz molu. Soc dauzit, it kai tej mašina byutu wainiga.

— Siwin',—soku es,—mašina tak naw wainiga. Par ju nauda moksota. Pažaloz naudas.

— „Pažaloz naudas“—soki. — A tu žaloji, kad perki. Par taidu niku moksot tik lelu naudu! Pasawer,

kas te ir. Bliakas goboli, tarauds un wēl kuka gabaliņš. Cik tad žēids par ju dus? Ka kot speidigs! Ni lels, ni skaists! Es zynu, kas tew tu istosteja: baznickungs, na kas cyts. Piminesit mani jyus obeji . . .

— Siwin', lyudzama, naklidz, — teiču es, sajemis drusumu — barni tak klausos. Kas padarīts, to nagrīzsi.

— A wot i grīzšu! Reit jyugšu zyrgu un nuwešū atpakaļ uz pilsatu. Kot par puscenas atdušu! Wys nauda, a te kai dubliūs iswista.

Golā mes sagojom lelā streidā. Es nawareju to pacist un dsmēs lyku siwai kluset. „Nu, labi, klusešu“, — atbildeja jej. Porstoja runot, bet soce „garu dzismi“ ar osorom. Nagribut naadušam dagoja it nu satas uz kaimini Juru. Pastosteju tam wysu.

— Kaimin, — soka Jurs — nabadoj, wys byus labi. Es tak reitdin taisus uz pilsatu. Leidz reitam ku nabejs sagudrosim. Sagudrojām tai, ka Jurs reit brauks uz pilsatu. Tik na wins — jam muna Ane natycatu — bet ar sowu siwu. Tad jau byus uzticiba. Lai apmirinot Ani, ji pajems separatoru leidz, tai kai pordut. Atbraukuši pastostis, ka par separatora perkšonu ni wins i runot nagrib. Taidas litas perkut tik gudri un mociti liauds. Taidu liauzu asut moz, bez tam ji wysi jau nuperkuši. Tai tad separators gulešut pi šim naporduts. Daži otkon gribejuši Juru reizē ar separatoru west uz policiju, kai zagli. Nikas nagribejis ticet, ka zemnikim byutu taidas gudras mašinas. Tik caur zagšonu zemniks warut imontot separatoru. Zeidi i par wēlti nagribejuši jemt un jau taisejušis saukt policiju, bet Jurs laikā atsapercis — igryudis jim rubli. A skladā i klausit nagribejuši — tik ar ruku pamowuši. Pordutu litu ši atpakaļ najemut. Diws zyn, wai tys jyusu asut? A zaglim pigataweta zynoma wita. Pilsatā lobok i narodit taidas litas — cytaidi byušut slikti.

Taidu apmaram runu sagudrojam mes pasacit, kad Jurs grīzsis atpakaļ ar separatoru . . . Utrā dinā Ane beja wysu laiku namiriga: pordus wai na? Un par cik? Ar kaidu napacitibu jej gaideja Jura! Jau par lelu gobolu, uz Prižu kolna, winia maneja Juru braucut un laides tam priškā. Sateik, pasawer rotis un gaudas osoras paberst jai pa acim.

— Tai i napordewet? — waicoj Ane.

— Ku tu, mosin, runosi par pordušonu. Labi, ka paši dzeiwi sprukom waliā.

Un te Jura siwa soce stotit par tom brismem, kaidas satykušas šus pilsatā. Stosteja ar taidu bolsu, ka jau i es pats soku beitis, wai patiši kas nanutyka. Tai weikli atstotit wakar wokorā sagudrotu posoku na kotrs wares. Te i liauni žēidi, i policija, i zadziba, i citums. Wiss tai skaidri un . . . brismigi. Ane jau porstoja raudot, nu bailem jej nazynoja, ku darit „A wai, Diwin', a wai, Diwin'“ — tik i dzerdejos jos leidzjyutibas wordi.

— Braucam mes jau nubaiditi uz satu, — turpynoja Jura siwa — a te naz'kaidis nakriškons, kungs ar speidušom pugom, dreizi it mums pakal'. Te jau, dumojam, myusu gols un wys weramis atpakaļ, wai wares izbegt. Kai na steidzamis, pret kolnu kungs dadzyna. Es soču prasit un lyugtis, lai palaiž myusus waliā. Jis, tai kai niko nazynodams, waicoj, ko mums nu jo wajag (es gon saprotu to kunga gudribu). Mes socem jam stotit, ka mašina ir myusu, ka tik žēidi pliopoj, ka tej ir zogta, u. t. t. Wysu izstostejom. Kungs pasasmeja, pamowe ar ruku un laides toliok. Pat naudas nagribeja jemt. Lobs kungs, lai jam Diws dud weselibu! Redzi, kaidas badas mes redzejom ar tu separatoru! Lai Diws pasorgoj kotru! — nubeidze sowu stostu Jura siwa.

Šis stosts nubideja na tikwin Ani, bet pa daliai ari mani pašu. Warhyut tur, tajā pilsatā, patiši kas nutyka. Welio, siwai nadzeržut, es pawaicuju nu Jura par šitu.

— Klaus tu munas weces runu! — atsaceja Jurs. Separators mes i nawodojom leidz pilsatai. Atstoju pi siwas tawa, Dridžu cimā, ka toli nawodot. Atpakaļ braukdami, pajemem. Taidas beja myusu badas!

Pec taidom „brismem“ munai Ane i protā naigoja west atpakaļ separatoru. Sewiški baideja ju tys, ka jej naprota pa kriwyskam. Bet skladā un policijā naprota latwyskos woludas. Ane beidos to, ka nalaimes reizē, kad ju paskaitis par zagli, winia nawares izskaidrot litas. War patikt citumā i pa „etapu“ war ju dzeit, kai dzan liaundarus, ar sražnikim. Lobok jau pagaisynot tus rublius wai iswist dubliūs, na pelnet taidu kaunu, dumoj sewi Ane. Myužigs

kauns byut „raštanu“ kortā. Kas zynos, ka jej nawainigi ciš?!

Tai separators palyka pi mums. Bet nu reizes Ane nazaudeja ceribas kai nabejs ju pordut. Warbyut kas nebejs i nuperks kot par puscenas? Ar laiku atsaroda ari perceji. Ti jau dewe na puscenas, bet daudz wairok, bez kaidim picim rublim pylnu moksū. Towu breinumu! Tagad jau paša Ane ni par ku nagribeja pordut. Cytu reiz es pastostišu „Drywas“ lasitojim, kaidi imesli beja šam breinumam. Cikom kas, lai paši lasitoji sprīž par šitu.

Čenču Jezups.

Kometa (1910 godā).

Winā lelā cimā
Zinia beja izplateta,
Ka majā ap pusi
Nusiss liauds kometa
Porjemti ar baimi
Cima liauds runoj,
Par šu nalaimi
Sagojuši badoj.
Siwites isoc runot:
„Wajag pisagatawot!
Ku tī daudz badot?!
Wajag grakus izsyudzet.
Tulaik baist nabyus
Sasatikt ar smerti,
Kot pasauliam gols byus,
Kot ar dzeiwi byusim škerti“.
Bet weiriši na tai,
Na tu dzismi dzid:
„Kometa kriss, zynoms,
Wajag uz krugu it.
Pasauliam hyus gols, —
Naw ku monta žalot!
Izdzersim mes ols,
Ku tur daudz badot.
Ka pasauliam byus gols,
Mes del šito naraudosim.
Krugā ira daudz ols,
Izdzaruši padzidosim.
Moz byus šito dzerinia,
Dabosim mes cyta. —
Ka krugā ira brandwinia,
Zynoma mums lita“.
Bogoti par naudu dzer;
Bedigim kuldas tiwas,
Bet i ti pa pylnam dzer,
Koleidz pordzer sowas siwas.
Porgoja kometa. —
Nikam redzet natyka!
Wysus dzeiwus pamete, —
Bedigi bez siwu palyka.



Uz myužibu.

Skrin pec dinas dina,
Tak kai yudins nedelias,
Dreizi skaitos meneši,
Porit godi naradzut,
Pat un myuži nusawel'
Ti, kur laikam gols, —
Kur socas myužiba.
Brauc, it liaudis winumar,
Cyts pec cyta dzeidamis.
Wins grib izbegt erškežus,
Utrs nok priškā ruzitem;
Tys grib redzet sauliti,
Cyts spudru i zwaigzniti.
Brauc, it wysi steidzigi
Tai pat priškā myužibai.
Wyss uz garu myužibu!

Purins.

Pi šyupulia.

(Tulkojums).

Šyupoj mote berniniu,
Dzismes winiam dzid;
Mozu sowu deliniu
Kairinoj un teic:
„A—a—a, čuč, milajs muns,
Skaistajs boludīt,
Spudro muna zwaigznite,
Jauko pukite!“
Šyupoj mote deliniu —
Meness lugā spiž —
Ku jaj izaudz's moziniajs
Naz'kod atdzidos? . .

Paziniojums.

Rezeknes aprinkia Zemstes walde („uprawa“) pazinioj, ka 16 martā 10 st. reitā Rezeknē, Zemstes waldes ryumēs nutiks torgi uz dorbu nujemšonu del remonta pataišonas daudzūs pogostūs (joprowej školās wai špitalius). Dažōs witōs dorbs mozoks, bet dažōs lelōks. Pimaram, Solujoniūs uz 629 rub. 75 kap. Dorba nujemeji, aba „podriadčiki“ latwiši lai napalaiž garam šo gadejuma nusa-pelnet pašā Dzimtenē. Wyss dorbs iznas porī par 3 tyukstušim rubliu. Tim, kas grib nujemt dorbu, joinas „zalogs“ 10% nu to dorba, kuru gribes nujemt. Rekinus uz šim dorbim jau agrok war skatētis kotu dinu nu 10 st. reitā leidz 2 st. pec pusdinas, izjemut swatdines un swatku dinas.

Gudribas gromofa.

Naw uz pasaules loboka niko,
kai pricodamis labi darit.

Ku redz liaužu* acis tagad, tys
jau seniok beja. Un tys, kas byus
— jau sen ir bejis. Jauna niko.

Smikla goboli.

Wismiliba.

Tisnesis. Kai jums nabeja
kauna tik brismigi sasist cylvaku,
kuru paši paaicynojojot cimā?

Apsyudzami. Mes tak, kungs
tisnesis, del to ju i paaicynojojom . . .

* * *

Aptekā.

— Lyudzū, idudit man pul'wera
del kustunes iznycynošonas.

— Jums papeirā wai kastitē
pibert?

— Na. Jau asot tik lobi — pi-
berit man aiz apkakles.

* * *

Pi doktora.

Slymajs. Jopisazeist jums,
doktora kungs, ka, saslimis, es gri-
žus pi Jonana, kurs, ka jyus zynat,
zolioj ar satas želwem. Jis man
iteice . . .

Doktors (portrauc). Intere-
santi, kaidu mul'kibu jis wareja
jums iteikt!

Slymajs. Jis man iteice it uz
jums zoletis.

* * *

Pedigajs leidzeklis.

Nu i publika! Es prosu paleiga
franču woludā — un man dud tik
diwi kapeikas! . . Kai tys tew pa-
teik, a?! . . Brismiga nagudiba un
bezkauniba!

Tai! . . Pec ito wysa palik
wins leidzeklis: aizmerst kaunu un...
it strodot!

* * *

Mocitojs. Tai tad, cinigi
kungi, ceru, ka jyus labi tagad sa-
prutat, cik lelu nalaimi nas dzer-
šona! Tamdel pametit brandwini!
Lobgk dzerit wysod teiru yudini!
Nu yudinia wel nikas **naizgaisa!**

Bolss nu publikas. Pagaidit,
cinigs mocitojs, Jyus aizmerstat
tus, kuri namok maut. Cik tu be-
digu nu yudinia gaist! . .

* * *

Nugojušu nu prota slimnica.

Doktors. Par ku jyus šite
patykot?

Sliminiks. Izgoja mozs por-
protums: es beju un asmu porli-
cynots, ka wysi liauds ir bezprotigi,
bet wini soka, ka es taidš asmu.
Nu, un saprutama lita, liauds ar
pulku i uzwareja mani.

* * *

Par nedeliu pec kozu.

Jaunikis uz swoču. Nu i
iswotoji, ka tewi nalobajs nurautu!
Jau taidu tu man, Morin', siwu
iswotoji, ka kot tu nu satas bedz.

Swoča (dusmēs). Ot, šito man
tik i tryuka! . . Moz man wēl to,
ka tikku, ar taidu pat žalošonus uz
tewim beja pi manis towa siwa . . .
Wylks lai jusus raun obejus, ka na-
mocit gudigi dzeiwot.

* * *

Budē.

— Es wakar maizē atrodu diwi
noglas.

— Wai tu redzi? . . Teira zag-
šona nu myusu: noglas mes por-
dudam pa 15 kap. marcinu, bet par
maizi mes pajemem nu jums tikai
3 kap.

Redakcijas atbildes.

Kg. Andiniam Jul. Paldis par Iobu
wordu. Liko nauda (50 k.) tiks atduta
„Drywas“ lobā, jo redaktors atsasoka ju
jemt sowā lobā, jo wyspori par rokstim
jis naudas napijem. Iteicam jums „Drywu“
platit storp daudzējim Šlisselburgas lat-
wišim.

Kg. G. Kempeliam Zwar. Adw. Pisyutitu
uz myusu worda naudu 7 r. 50 k. gorigu
gromotu izdušonas lobā sajamem. Lels
paldis.

Leiwonu kroj-aizdawu kasai. „Drywas“
pabolstam 15 rub. sajamem. Sirsnigs
paldis.

Izwolta kroj-aizdawu kasai. „Drywas“
paturešonai 25 rub. sajamem. Par labda-
ribu lai Diws aizmoksoj!

Kg. Seimaniam Putanam. Paldis. Nu pi-
syutito padeju reizi materjala, mes pi ga-
dejuma izlitosim par „Irodumu mozgot
kojas“.

Kg. Fr. O. Labprot soksim drukot, kad
jau byus pisyutitis wys materjals.

Kg. Lapiniam. Paldis. Pyulesimis iz-
litot weliok. Tagad daudz materjala stei-
dzigoka.

Redaktors-izd. b-kungs **K. SKRINDA.**

Piterburgā „Drywu“ war izrakstīt:
1) pi kg. Ignata Assana pa adresei: Казачий пер. 9, кв. 97. Dorbadinom war rakstetis nu 7 leidz 9 st. wokorā un swatdinem nu 1 leidz 3 st. pec pusdinas,

2) pi jndzes A. Bžezinskas pa adresei: Фонтанка 137, кв. 26,

3) pi kg. Boleslawa Šulgo — Katedras baznicas šveicara Pyrmajā Rotā, iejut baznicā,

4) pi kga Powula Laizana, Безенбергская 3, кв. 15.

Izrakstītojm mynatos personas izdus kwites par sajmту naudu un tad awize byus syutita.

Sludynojuumi.

Izgoja nu drukas latwišu woludā
Eisa Sw. Westure.

Dr. Šustera.

Utrajs izdawums.

Daudzumā dabojams pi W. Gaudzes Dwinskā, Rīžskaja ul. gromotu tergotuwē W. Gaudzes.

Izgoja nu drukas jauna gromatinia
„Swata Ignata Rekolekcijas“

(500 puslopu biza). Moksa 60 kap. Gromatinia dabojama daudzumā pi bk. K. Skrindas pa adresei: Гатчина, Костель un pi bk. O. Tumaņa: почта Варкляны, Витебск. губ.

Bez tam, pi bk. K. Skrindas dabojamas gromatinias: „Sw. Aloiza Dzeiwe“ 7 kap., „Dzeiwa Rožanca“ 10 kap., Ticibas izskaidrošona, Baznicas ceremoniju izskaidrošona 20 kap., Maja Kolpošona Jumprowa-Marijai 20 kap.

Jo ir kaidas porprasšonas „Drywas“ pisyutišonas ziniā, — laipni lyudzam griztis uz „Drywas“ ekspediciju (Фонтанка 137, кв. 26, j-dze A. Bžezinska).

Nokušajs „Drywas“ numers izis
14 martā 1912 g.

Leiwonu kroj-aizdawu kasas bilianss 1912 godā:

Pasiws.		Aktiws.	
Pamata kapitals	4054 r. 75 k.	Naudas sumas kredī-istodēs	1001 r. — k.
Zoposa kapitals	60 „ 38 „	Aizdawumi porodā	23283 „ — „
Porejušas sumas	601 „ 28 „	Monts	165 „ — „
Teiras pelnias 1911 godā	1252 „ 51 „	Teirā naudā	418 „ 92 „
Wysā	24867 r. 92 k.	Wysā	24867 r. 92 k.

Bidriba par aizdutu naudu porodā jem: 9% (procenti), kad aizdud uz eisok na uz gods, — 8,4%, kad izdud uz gods laika leidz diwim godim — 8%, kad dud uz diwim godim, — 7,6% kad aizdud uz trejim godim. Par igulditu naudu bidriba moksoj: 6%, kad igulda uz gods un wairok — 4,8%, kad igulda uz pusgods nn 4,2%, kad joizdud nauda pi pirmos welešonas.

6000 person. bidru, ostondesmit picas bidr. bidrines ar wairok, kai 425,000 rub. dalibas naudu

Latwisu Lauksaimniku

Ekonomiska Sabidriba.

Walde un Centralnulyktowa

Reigā, L. Keniniu ilā №. 27/29.

Nulyktowas Latgolā:

Rezeknē, Dwinskā, Leiwonūs, Preiliūs, Waraklionūs, Ludzā, Korsowā, Bolwūs, Baltinowā un Wilianūs.

Pidowynoj zemkupim wysaidus moksligus maslus, kai:

Superfosfatu, tomas-myltus, kainitu, kali-soli, čili-salpeteri, kaulu myltus

Obulinia

sorkono
bastorda
bolto
timoteja

saklas

un dažaidas dorzu un sakniu

„Globe“, Westa un Baltik separatorus, swista nejamos mašinas, spanius, kostuwes un t. t.

Dažaidus ikšzemes nn slowonus RUD. ZAKA uniwersal nn daudzlemešu.

ORŅLUS Original „Planet junior“ sakniu-augliu, sešonas, rewešonas un rušinošonas mašinas un kultiwatorus.

MAK KORMIK ; atspere ecežas, škeiwu ecežas, pliwu ecežas, un ikšzemes (skrituliu rullius un t. f.

Par bidrim Sabidribā teik pijemti obeju dzymumu lauksaimniki, kai ari bidr., imoksojut wysmozok 10 rub. bidru un 1 rub. istošonas naudas.

Sabidribas laikroksts „Zemkopis“ iznok reizi nedeliā un moksoj ar pisyutišonu bidrim un Latgolas zemkupim 1 rub., nabidrim 2 rub. 80 kap. godā.

1911 godā porduts preces par wairok kai 3,000.000 rub.